

24 OCT 2002

Konvensyen-Mahathir

PERDANA MENTERI RASMI KONVENSYEN BN PULAU PINANG

PULAU PINANG, 24 Okt (Bernama) -- Perdana Menteri Datuk Seri Dr Mahathir Mohamad dijadual merasmikan Konvensyen Barisan Nasional (BN) Pulau Pinang yang akan diadakan di Kompleks Sukan Balik Pulau pada 2 Nov ini.

Timbalan Ketua Menteri Datuk Dr Hilmi Yahaya berkata Perdana Menteri juga dijadual menghadiri program pemimpin bersama rakyat di Maktab Perguruan Tuanku Bainun, Bukit Mertajam pada hari yang sama.

Konvensyen bertema "BN Menerajui - Pulau Pinang Terus Maju" itu akan dihadiri oleh kira-kira 5,000 orang, katanya pada sidang akhbar di pejabatnya di sini hari ini.

Dr Hilmi berkata Dr Mahathir dijadual tiba di Lapangan Terbang Antarabangsa Bayan Lepas pada kira-kira pukul 9 pagi sebelum bertolak ke Balik Pulau dengan diiringi oleh 300 anggota Pemuda BN yang menunggang motosikal.

Pada sebelah petang, Perdana Menteri akan berlepas ke Bukit Mertajam bagi menghadiri program pemimpin bersama rakyat dan dijangka kira-kira 50,000 orang akan menghadiri program itu, katanya.

Timbalan Perdana Menteri Datuk Seri Abdullah Ahmad Badawi dijadual akan turut hadir pada kedua-dua majlis itu, katanya.

Dr Hilmi berkata orang ramai yang menghadiri program pemimpin bersama rakyat berpeluang membawa balik sebuah kereta Perodua Kenari yang merupakan hadiah utama cabutan nombor bertuah.

Pada perkembangan lain, Dr Hilmi berkata Timbalan Perdana Menteri dijadual merasmikan program "Multaqā Ramadhan Al-Mubarak" yang akan diadakan di Dewan Millenium, Kepala Batas pada 4 Nov ini.

-- BERNAMA

NER MOZ